



ОРГАН ЛЕМКОВСКОГО СОЮЗА.

Лемко, русска газета для Лемков выходит в четверг около 15-того и 30-того каждого місяця.

Редакция и администрация в Новом Санчі. Адрес: „Лемко“ Новый Санч.

Пренумерата в краю:

30 грошей місячно,
1:50 зол. полрочно,
3 зл. рочно.В Америці: 50 центов полрочно.
1 \$ рочно.

В Чехословакии:

2 кор. місячно, 9 кор. полрочно,
18 кор. рочно.

Именины Маршала Пилсудского.

Дня 19. т. місяця припадают именины Маршала Войск польских Осифа Пилсудского.

Ден тот хоц не ест церковным святом обходят жителі Польши торжественно, а то по причині великих заслуг, яки положил Пилсудский для польской державы. О том, чым Пилсудский ест днеска — знают вшиты — але не вшиты знают, о том, же Его дорога жытьова была терниста и же тот першый сын народа польского жыл ціле жыте не для себе и не личной вигоды, а посвятил свои силы и свой труд для добра свого народа. Не зломили той сильной натуры тюрьмы — не побоялся он выступити навет против своим братьям, коли увиділ, же тратят силы на партийну борбу — бо он не знае личных приятелей бо он любит лем свою Отчину — и готов для ней посвятити вшитко, бо для него може быти лем



тот приятельом, кто служит честно своему народу. Яко такой служит прекрасным примером для каждого народа, и каждый народ

может от него научиться того, як належит любить свой родный край и народ.

Если додаме до тех благородных черт того велького человека и богатыра ищы тот гениальный ум политичный, котрый в каждом трудном положыню найде все найліпшу дорогу до усуненя перешкод и котрый допровадил до того, же тепер Польша занимает почетне місце серед европейских держав — стане для нас яснее, чом тот ден 19. марта обходится торжественно. В том

дню зложат своему вождю шыры желаня не лем граждане польскы, але также другие народы европейскы, серед котрых тішитя наш Тезеименник славом великого державного Мужа, политика и героя.

Побіда Лемков.

Недавно выповіл министр внутренних діл г. Перацкий велику бесіду, з котрой для нас найважнійше того, як теперешне правительство относится до других непольских народов, яки мешкают в Польши. В той справі выповіл г. министр Перацкий, же Правительство в жадном случае не стоит на точці зрїня тех Поляков, котры спротивляются добросусідским отношениям вшитых народов, жыющих в Польши и котры признают лем за собою право до державно-творческой работы.

Наше правительство повіл г. министр смотрит на тоту справу так, як вымагают того

интересы державы, а тоты интересы сут поставлены выше партийных.

Газета варшавка „Kurjer poranny“ объясняет тоту бесіду г. Министра и пише, же такой поділ народов одной державы на граждан з большыма и меншыма правами былбы не лем понижающий для польского народа — але также принесбы нашей державі шкоду, бо польский народ в борбі з другыма народами заселяющыма землі нашей державы — тратилбы силы на тоту борбу, што вышлобы зо стратом для цілой державы.

Так повіл г. министр в своей бюджетовой бесіде — а в остатних часах мы прекоуемяся, же за словами г. министра идут и поступки. Як каждый любячий порядок человек — так и правительство мусит дбати о того, жебы

в державі был лад и порядок — жебы был спокой и жебы вшиты люди шанували права. Без того пошануваня права при зле пониманой свободі дошла бы держава до безпорядку, а втотчас никто з нас не былбы певный своего маетки и своего жытя. Правительство мусит карати тех, котры права не шануют и робит того навет и в тех случаях, де иде о недозволени и противзаконну роботу Поляков.

Але з другой стороны видиме в остатних часах, же тот само правительство помагат розвиватися тем людям, котры шануют права — и домагаются тех прав для себе. Гардый примір того маме на нашей Лемковині, де правительство позволило нам в прошлом року на введенене рускых книжок до школы и утворило тепер отдільне епископство для Лемков. При том епископстві буде и духовный семинар, в котром наши діти будут могли кончыти богословскы науки — и таким способом будеме мати зас своих священников.

Буде там также и наша гимназия в котрой наша молодеж буде могла брати науку в нашом материнском языке. Ест то велика побіда Лемков а также и доказательство, же слова г. министра Перацкого то не фразы, але же наше правительство робит так, як заповідат. Тоты факты сут также доказательством и того, же лем спокойный и систематичный труд може дати добры результаты. Не помогут нич крики на собраниях и вічах — не помогут угрозы, бо тех се встрашится никто, помочи може лем — добра организация и тиха некриклива але тягла работа по наших селах. Нехай в каждом селі буде кооператив и читальня, але не пото, жебы в кооперативах никто не купував, а кто мог, то вкрал и не по то, жебы до читальні никто не ходил и не заплатил навет членского взноса — але нехай тоты кооперативы и тоты читальні выказуют жытя — нехай они потрафят згруппувати вшитых людей в селі то втотчас поможеме не лем собі и шмариме нашу біду в кут, але станеме ся пожиточном державно творческом одиницьом, з котром правительство и вшиты мусятся рахувати.

Початки дало нам правительство, бо даючи нам свою школу и своего епископа, сотворило для нас новы, лекшы условия работы, але власне тепер не треба заложити руки — лем з новым силом взятися за экономичну и просвітительну работу.

УВАГА: Зберайте оголошыня и присылайте до газеты „Лемко“.

Лемковське єпископство.

Наше правительство и Апостольська Столиця отнеслися доброжелательно до внесенной в вересню 1932 р. просьбы наших людей и утворили отдельное епископство для Лемковины. До того епископства належат деканаты — Буковско, Сянок, Дынов, Рыманов, Ясло — Дукля, Коросно, Горлиці, Грибов и Мушына. Местопребываньем того епископства буде Рыманов. При епископстві має бути утвореный духовный Семинар и русская гимназия.

Першым апостольским администратором з полными правами Епископа именовано О. Дра Николая Нагорянского, теперешнього войскового декана в Варшаві.

О. Николай Нагорянский, прелат, декан и шамбелян Ап. Ст. доктор св. Богословья уродился во восточной Малопольше в р. 1879. Высвяченый в р. 1907, был в часі світової войны войсковым капеляном. Яко такой был приделеный на якийсь час, яко капелян гарнизонного ареста во Відни, де втотчас сиділо много наших людей. И ту тоты страдалці за наш народ могли познати щире русское сердце О. Дра Нагорянского. Втотчас як вшитыкы боялися признати до знакомства з тима мучениками — втотчас, коли напавду достатися до криминалу было барз легко — тогда О. Др. Нагорянский в своих проповідях, які нам выголошувал, выступал все открыто яко русский, не зважаючи ани на сторожу, ани на гарнизонное начальство, котре все прислухувалося нашим Службам Божым. Дал О. Др. Нагорянский втотчас прекрасный примір стойкости своего характера и храбрости. И тоту стойкость затримал до тепер бо помимо преслідуваня през власти церковны в остальных часах вшиткого, што русское, Он открыто спомагал наши просвітительны институции и Его назвиско можна было часто вычитати в списке жертводателей. Помимо громов сыпанных през украинцев на Талергоф и вшитыкы обходы талергофскы — О. Др. Нагорянский жертвовал и на тоту ціль, штобы зазначити, же он преклоняет Свою голову пред прахом тех мучеников полеглых за наш народ.

Тота стойкость О. Дра Нагорянского была знана добрі так нашим политичным властям,

як также и Апостольской Столиці, и власне длятого коли утворено для Лемков отдельное епископство — покликано Его на того высоке місце бо власти знают, же такой человек, котрый ишол твердо все по выбраный дорозі, пиде том дорогом до смерти и переломит вшитыкы прешкоды — які будут мукласти противники. Для нас ест то вельке счастья, же утворено отдельну епархию для Лемков, але ищы векше оказуеся оно длятого, же назначено першым лемковским епископом заименовано знаного нам вшитким и заслуженого патриота. Витаме го радостно и щиро именем вшиткых Лемков — витаме го и віриме же наступила тепер нова ера в жытю нашего народа, ера спокойного труда — и братской любви. Найзгыне всяка ненавист и найпропадут вшитыкы тоты котры сіяли у нас тоту ненавист. Найсчезнут тоты, котры зробили роздвоиня в нашей церкви а мы назад лучмесь вшитыкы не тратме часу на партийну и религийну борбу але вытужме наши силы для общего добра и для поліпшаня нашего господарского быту.

Душы Талергофцев.

В страстный тыжден каждого року на високой горі Яворині — понад лісы и потоки тихенко плыве Ясный облак....

То души замученых Лемков, Легицькы як гмла — знимаються на вершыкы смереков — штотраз ниже — аж осядут на поляні — А вітер грат тиху, смутну жалобну нуту. Прозрачны, чысты душычкы сходят на землю.

Обнялися вшитыкы разом, як братья и сестры родны. Пришли посмотри на дорогу, материнску землю ..

Вшитыкы пали жертвом ненависти и зрады тех яничаров, што жили нашим хлібом и дышали нашим повітрям.

Вшитыкы понесли муки и смерть за родный край, за народ, свой, и его свободу.

Поклякали души на поляні, поднесли руки до горы и молятся за нас и за наши діти.

А з их сердец выходят ясны прамена просто ку небу.

Звезды погасли, а ясны прамена освітили небо....

То молитва мучеников взнеслася до Всевышнього.

Долго світло видно было на небі, аж над самым свитаньем загасло....

Счезли души.

А ліс смерековый зашуміл, а в том шумі чути было выразно: Талергоф... Талергоф..!

Талергофский з'їзд во Львові.

Минат 20 роков от часу, коли то в р. 1914 гуляли по наших лемковских селах жандармы и други посиаки австрийскы и арештували и мучили невинных сынов наших лемковских гор 20 роков тому, як впали з рук австрийских катов честны головы Сандовичев, Крелив, Крыницкых, Мохнацкых и Вірхомлян. Мучеников лемковских жыє ищы в нашем народі жыют их души и загівають нас до дальшого труда.

Шумят сосны над могилами погибших наших братьев в Талергоф — лежат тоты мученики там далеко на чужині и никто о них не памятит — никто не засвітит им там свічечкы ани не отслужит панихиды. Часом лем отозвесь меже соснами чорный ворон, котрый тихне скоро не хотячи прерывати того вічного спокою — який панує под тима соснами.

Але памятают о своих нянях сынове — памятают братья, памятают сестры — памятают о них и не забывают о своих обовязках взглядом тех невинных мучеников.

Они хтят их учтити так, як можут, они хтят помолитися над их могилами за их души и длятого то уряджают В МАЮ ТОГО РОКУ вельке свято во Львові, свято, в честь погибших в часі войны наших людей. На том святі отбуде ся посвячєня Талергофского памятника — и отслужыт панихиды над могилами, котры спровадится з Талергоф и также и над землем привезеном з гробов других наших мучеником. Свято вельке, свято важне — бо то погреб и отданє чести памяти нашим найліпшым сынам. Тот ден повинны вшитыкы посвятити и явитися численно под Талерговским памятником. Не забудме также и о том же сам памятник и спроваджєня могил з Талергоф коштує много пінязей и зберайме по селах жертвы на тоту ціль. Ест то жертва Богу мила, бо дана за души померших. Найдаст каждый, што може — хоч



Послушайте братья Лемкы бесіды Луця-Пуця выголошеной в одной лемковской читальні „Проевіта“ о красоті украинского языка. Бесіду подаю по украинскы, так як ю выголосил Луць-Пуць.

Відомо на цілім Божім світі, що українська мова співуча. З нашою мовою може рівнятися хіба італійська мова у відношенню до красоты, елястичности і ріжноманітности відтінків, співучости, та гармонії. Возьмім таке н. пр. „Рома льокута — кауза фінита“ що по

українські можна перелицьовати: „Хома до кута казав Микіта“ значить мала ріжниця, як всі чуєтє.

Не тільки є наша письменницька мова співуча але рівніж плачуча. У нас без мала усі пісні зачинаються або від „ой“, або від „гей“. То специфічна прикмета нашої мови. Того не треба доказувати бо усі знають: „ой на горі, ой у полі, ой під лісом або гей на горі, гей у полі, гей під лісом. В іншій мові оно таке „гей“ або „ой“ вышлобы глупо, але у нас є це не тільки натурально, але і артистично. Возьмім на примір полатині: „Ой абредере Катиліна“, або по німецькі: „Гей ін дер Нахт, вен ди Лібе ервахт, або і по англійські „Гей гав ду ю ду“ — значить не пасує і кінець. Навіг по московські хоч московська мова найбільш зі всіх на світі подібна до нашої, а й так наше „Ой“ чи там „Гей“ не дасться достосувати. „Гей, водку пей, да д'їло разум'їй“ або „Ой! Куда парень молодой!“ Сами видите, що неможливе.

Наша мова и московська — це вогонь и вода, ні ліпше скажу, це день і ніч, або ще лучше це попросту культура и безкультуре а ви самі тепер оцініть який епітет котрій мові, нашій чи московській причіпити. Історики кажуть, що колись не було ані української, ані московської мови а була малоруска, цеб то руська і усі нею балакали.

Я в це не вірю, бо українцям не вільно вірити в історию, хіба, що її написав Грушевський або який інший Тиктор. А у других істориях брешуть. Шкода читати, Українець хай історії не читає, бо тоді — україна піде в чортову діру.

Найбільш интересуються нашою письменницькою мовою і усім, що українське — Японці. Нарід дуже культурний, та бадьорий, може трошкі менше, як українці, а може і ні. Недавно, як доносить спеціальний кореспондент „Новой Зорі“ із Шангаю (це векике місто у Китаю) була велика та славна імпреза українська, а саме відкрили в самім Шангаю, українську Просвіту. Гостей було чимало, Китайців, Хунхузів та Японців представників близьких нам по душі та вдачі азійських народів. З наших промовляв славний наш організатор в таштім районі, бувший Пеплюровець Стецько Голодранець, потім Китаєць Чай Це-Хам підніс великі заслуги чумаків на Україні. На кінці сказав дуже симпатичну мову Японець-Йокі-Токі. Балакав довго и цікаво про українську культуру, про симпатію Японців до Українців, про вишивані сорочки і несорочки. На кінці вручив на руки передсідника зборів синьо жовтий прапор з тризубом в доказ сердешної приязни з вдячности. За се предсідник дав Японцеві в имени українського народу світліну Івана Мазепы з дедикацією. Японець дуже красно подякував.

По врочистости відбулися танці. Пустилися всі в дисюди, наші, за нашими Японці та Хунхузи. Такий був стіхійний гомін та гук, що стеля тріщала. На кінці усі засьпівали унісоно: „Ще не вмерла Україна“ але з такою міццю, що аж шиби тріскали.

На це прийшла поліція і розігнала усіх, а Голодранця такі арештувала. Але японський амбасадор запротестував.

Подслухал Лемко.

не дуже, але як даме вшиткы. то збереса то-го дост на вшиткы розходы.

Жертвы належит посылати на адрес Центральный Талергофский комитет во Львові ул. Бляхарска 9.

„Дякуємо“ пане Тиктор
гарді за газету
Але мы не всі бортакты
познаме тандету

Грошы дайте своим людям
преця мрут з голоду
А не тратте на газету
бо шкода заходу

Вы нам Лемкам „Вашым Лемком“
Не мыдлийте очей
Україні кус поможте
Там треба помочи!

Мы не даме ани гроша
За вашу „бумагу“
За дурно не посылайте
Майте же розвагу.

Бо як нон не отмолодне
Што ся уж зостаріл
Так и з нас никда не буде
Подлых яничарив!!



ВАНЬО: Ба ле свату повіджете но мі раз — коли тот кризус ся скончыт?

СЕМАН: Та того вам свату повісти не годен, але тото знам напевно, же як долго будут пхатися до нас украинці — так долго буде кризус.

Уж вышол з друку лемковскый
СПІВАННИК з нутами.

Можна набыти у

Wł. Rzepecki Stary Sącz.

З наступным номером газеты, котрый выйде

дня 29 III.

вышла Редакция

Ч Е К Ы

РУХ В НАШИХ СЕЛАХ.

Мшанна пов. Коросно. В нашом селі ишла народна робота куляво, бо не мали мы помішня. Кооператив містится в дуже малой и вльгой комнаті. Читальня містится в господарской хаті и не выказує также такого оживлення и діяльности, як нымагают статуты.

Зрозуміли тото Мшанчане, же если не будеме мати потребного помішня для наших организации, то каждый так просвітительный, як и економичный труд не даст пожаданных результатов и для того в 1932 купили мы площу и при помочи кооператива и читальні выбудовали мы гардый и просторый „Народный Дом“, в котром помістится читальня, кооператив, молочарня и килька варстатов, як ткацкий, шевский и столярский, в котрых моглибы наши хлопці и дівчата учитися ремесла. В том дому ест также велика сая за сценом.

В той салі „Народного Дома“ отограно уж два представления п. н. „Книжник“ О. Чайковского. В селі почынат будитися народ и брати до нового жытя, котре доведе нас до ліпшой долі и зривнат з культурным народами.

Правда — где нас — ишы велька робота, бо дом не выконченый, але при доброй волі и помочи наших братов з Америки потрафиме довести до конца розпочате діло. Дакотры з наших братов, як наш перший просвітитель О. К. Дутковский, котрый жертвовал 5 \$ и г. Михаил Костик, жертвовавший 2 \$ дали гардый примір жертволюбия на народны ціли и им складаме тым путем щиро руске „Бог заплат!“

Маме надію, што и другы наши братя из за океана пидут за приміром тых жертвователей и допоможут нам докончыти „Народный Дом“ в Мшанні. *И. А.*

Шкляры пов. Сянок. В нашом селі была читальня им М. Качковского и до ней ходили стары и молоды, жыли в згоді и любви и не было николи нияких сварок ани гніву. Не подобалася тота згода нашому священнику Украинцюви и тог почал баламутити людей якомси украином и нашлися такы, котры повірили ему и основали читальню „Просвіты“. Розпочался тепер правдиво украинска просвіта в селі, з котрой сміются тепер навет самы тоты — котры дали втягнути до „Просвіты“. Доказ той кукьтуры дал в риздвяны сваяга сам священник-украинец, котрый казал своим „просвітникам“ выганяти з церковного хору тых, котры не дали збаламутитися ему и не приступили до „Просвіты“. Забыл бідачиско, або и не знал о том свящ. украинец — же церков. то не віче в читальні „Просвіта“ и же церков ест для вшиткых віруючых, а не для самых украинцев. Але ту наступил конец украинской „Просвіты“ бо збаламучены люде познали до чого веде их украинский агитатор и не зневажили святого місця, што так розлостило украинця, же аж му бесіду отняло и от слов „Рцим“ была уж лем тиха „Служба Божя“. Отзыскал бесіду аж по Службі Божой. Коли вышол з церкви почал ганьбити хлопцев з „Просвіты“, а тоты выписалися з читальні „Просвіты“, и тепер зас вшиткы люде жыют в згоді. Вельку заслугу для русского діла положыл Петро Югас, котрый zorganizувал нашу молодеж п не далс збаламутити помимо того, же долгий час украинці з „Просвіты“ докучали му — не позволяли танцувати на забавах и грозили навет тым, же го побють. Честь ему за тото и чест вшиткым тым, котры не сіют незгоды в селі, лем братску любов. *Завадчанин.*

Устє Русске пов. Горлиці. От Г-на Ивана Басалыгы отримала редакция допис, котру поміщаме без змін.

Слово нашим Братям Лемкам!

Як знаме, пред світовом войном розвивалося наше культурне и економичне житя ліпше як тепер по войні. Мали мы веце рижного рода организации, свою газету и т. п. но и были мы богатшы в нашу трудову интеллигенцию, котра руководила народным жытьом.

Та пришла война, а з ньом злопамятный для нашего народа терор, котрого ціль была стерти з лица землі вшитко, што русске. Стараньом и фальшывыма доносами псубратов выслано из родной Лемковины тисязы ей ліпших сынов в австрийске пекло Талергоф, откаль лем мала част обезсиленных вернула в родны страны.

Раділи серця губителей што осягнули ціль, што покончыли з проклятым ворогом. Але як бесідує пословиця: „каждой біді-конец приде“ скончылася война, пришил конец терору, и як по великой бури уступають тучы и появляются ясне сонце, так и на пашой Лемковині помаленкы начынаются нове народне жытя.

По войні открыто зас бурсы, оживлені и основано новы читальні, кооперативы, пожарны дружины и т. инше. Але найбільше отчувался брак своей газеты, бо народ без своей газеты, то так, як глухонімый человек — неспособный до жытя.

Наконец стараньом Лемковского комитета выпущено перший номер газеты котрой обовязком ест народне освідомлене, организация и оборона народных интересов высуненого найдалше на запад платка русской землі той родной и милой Лемковины.

Та каждая газета зависима от своих подписчиков. Так и „Лемко“ утриматся лем в таком случаю, „сли мы его поддержиме, иначе буде мусіти упасти.

Успіх его развития буде нашим свідоцтвом, ци мы способны до жытя, ци на смерт.

Способны на жытя окажемся втотчас, як повіриме в свои власны силы и уж раз на все престанеме оглядаться на рижных маскованных спасителей, котры и днеска проливают крокодильячы слезы над бідным и несвідомым Лемком але им не лежыт на серци добро и культурне поднесенє лемка, бо они хотят его використати яко орудие и материал для своих политических цілей.

Тому взываю Вас братя лемкы, вставайте в ряды подписчиков „Лемка“ розпространяйте его по вшиткых закутках Лемковины; най не буде села ани хыжы, дебы не загостил наш дорогой „Лемко“.

Посылайте дописи из рижных отраслей народной жызни, обміняйтесь мыслями — а з того выкуєся ліпша доля родной нам Лемковины. *И. Басалыга.*

Рыхвалд п. Горлиці. В нашом селі начался в половині лютого курс білокожицтва (ліпша выправа скоры) котрый буде тырвати 6 неділ. На курс тот записалося 20 учасников, 5 из ясельского повіта, а остальны з Климовкы, Устєя русского, Ганчовы и Рыхвалда пов. Горлицкого.

Курс уряджено коштом Рольничой Палаты в Кракові и Самоуправного Выділа Повіт. в Горлицях. Наука на курсах безплатна. Учытна тых курсах специалист, білокожник из Гарволина.

Тот курс ест доказом, же наши люде берутся поважно до господарчого поднесеня.

Горлиці. Діяльність нашой Бурсы в Горлицях. Наша Бурса в Горлицях купила киноапарат. Дня 18. лютого выїхали з тым апаратом делегаты Бурсы инж. Александр Бодак и реви-

зор кооперат. Яновицький на села Лосє, Климковка, Усте русске, Ганчова, Висова Ропкы, Блехнарка, Сквиртне и Квятонь.

Делегаты уряджают популярно-науковы лекции для молодежи и старших, котры иллюстрируют фильмами. Заинтересуваня тьма лекциями вельке, люде приходят численно на тоты лекции и часто трафятса, же не можут поміститися в саях.

Межибродє пов. Сянок отрясатся от украины и приступат до будовы читальняного дома. Молодеж зобрала з коляды 25 зл. Предсідатель чит. им. м. Качковского жертвовал площу под дом — громадяне дали 100 зл и 100 зл. дала читальня и на весну мают приступити до будовы. Священник украинец мече громы, и не впускає до церкви русский хор — але люде робят свое. Честь им за того.

Завадка Рымановска пов. Сянок. 21, сїчня отбылося в Завадці Общ. Собрание читальні им. М. Качковского. Из доклада председателя видно, што Завадчане не спят. Они выбудовали новый читаль. дом и не устают в роботі просвітительной и экономичной. Читальня дала 2 представлення — и ряд лекции з пчоловодства, садоводства и господарства. Помагай Бог в дальшом труді.

Сянок. Читальня в Сяноку уряджат курс для диригенсов хора. Курс розпочался в салі Народного Дома 22. лютого и буде гырвати 6. неділь. Плата за курс 10 зл.

Радочина повіт Горлиці. Просвітительна робота в Радониці розвиватся. Члены читальні им. М. Качковского недавно отограла 2 театральны штуки одну: „Бідна на світі пещена дитина“ — другу: „Захотіла пана, втратила Івана“. — На представлєне прийшло много людей из сусідных сел Чорного, Липной, Незнайовой и Святковой. По представлєню отбылася забава танечна.

Честь Вам Радочиняне!

ШТО ЧУТИ В СВІТІ.

Наше правительство дбат сильно о добрых отношениях з сусідными державами и о укріплєніи спокою в Европі. Недавно министр закордонных діл вернул з Москвы, з котром навяжуються шторази ліпшы отношения, а тепер подписано и введено в жытя польско-німецьку умову — в силу котрой през 10 літ не вольно жадной з тых дїржав розпочинати зо собом войны. — Вшыткы спори мают обі стороны полагоджувати без войны и кровопролития. — Таким способом польске правительство причинилося до укріплєня мира в Европі.

В Іспанії проготовляють комуністи нову революцію. В Мадридї, гол. місті Іспанії пришло до кривавых биток меже поліціейом и комуністами. Штрейкує почта и желізниця. И в самої армії ніт порядку. Боятся, же дойде до революції.

Японско и Совітскы отношения поправляються. Меже Японіейом и Совітами дошло до погоды в справі торгівлі рыбами во Владивостоку. Также сподіваяться, же дойде до погоды меже Манджуріейом и Совітами в справі входно-китайской желізной дороги.

Новый бельгийскый король Леопольд II. котрый вступил на престол 2. III. по смерти Альберта I., котрый забился на прогульці в горах выповіл бесіду, же буде продолжати политику своего отця.

Новый совітскый посол в Варшаві. Совітскый посол в Варшаві Антонов-Авсієнко іде до Москвы, а на його місце буде назначений Стомоняков.

Франція. Во Франції все ишы ніт спокою. В справі ошуства Ставиского ведєся слідство, котре выказує, же в тоту справу были замішаны министры. — Французы боятся также

и того, же нове правительство Думерга веде до реакции и приготавлиются до обороны демократии. Готово прити зас до неприяток.

Австрія. В Австрії розпочался рух, штобы привернути цисарство и першым цисарьом має быти Отто Габсбург, сын Кароля. Поперат тот рух Італія, котра хоче получить Австрію з Венграми. Боится того Чехословакия.

Поміщайте оголошєня в газеті „Лемко“. Кто хце прислужытиса нашой газеті нехай зберат оголошєня з міст и сел повітов Лєско, Сянок, Кросно, Ясло, Горлиці и Новый Санч

Де женитися.

Кто ма замір ся женити
Най он не жде до осени
Але най ся пообзерат
Най ся шуми поприберат
И най дораз ся оженил.
Бо кто сой жычыт доброй газдыні
Най сой выберат жену зо Ждыні.
А кто зас любит молоды дівкы
То най перейде аж до Ванівкы
Там сут дівчата „очень хорошы“
Але не мают ґрунту ни грошей
Як лем богаты, хоц стары вдивці
Можут сой найти жену в Ванівці.
Але як ишы молодой вдовец
Най ся выбере до Костаровец
Там сой выбере хоц и кус брыдку
Але достане дуже маєтку.
А ктобы хотіл доброй співачкы
То най ся звідат. де до Мохначкы
Де до Тылича, або до Гуты
Там сут дівчата, што знають нюты.
А ишы того — потихы повім
Же часом найде жену в Лабові
Лем до Угрына ніш чого ити
Бо там дівчата не мают дітей...
А котрый любит барз чорны очка
То най ся удаст лем до Вислочка
Кто собі жычыт зас парадницю
Тот най посьмотрит лем на Крыницю
А кто заїде аж до Завадки
То певно найде дівчатка гладкы
А кто уж нияк не найде пары
Той най ся звідат. де сут Брунары.
Бо там на тисяч пясот народа
Єдна тисячка женского рода
Ай в Вороблику, Шклярах, Кролику
В Избах, Ропиці, в Чырной, в Ріпнику
Лемковскых дівчат мате без ліку
Темпераменту лем тра до того
И кус отвагы и силы в ногах
Але річ перша, то сут доляры
Най о том знають млады и старі
Женитися можут навет и дурні
Ци то в Ріпеді, ци то в Остурні
Най собі каждый мапу розложыт
И най поглядат де котре село
Найде си жену, яку сам схоче
И буде ся му до смерти вело.

Сват.

Зима.

Стиснул землю мороз сивый
Под ногами дзвонит
Ледом ріку замурувал
Най Бог оборонит.
Зимне сонце попрез гору
До села зазерат
Всьо ся крыє де лем може
Бо зимна ник не рад.
Кус з полудня сонце зашло
А змерк скорым кроком
Потихенькы иде в село
И сіл над потоком.
Пхатся студін силом дохыж
Зо сін и зо двору
А з калениц сивый дымок
Вытягаты в гору.
Вшыткы пхаются ку пецу
И стары и діти
Докладают дров до огня
Жебы ся оґріти,

Тихо вокруг, лем ліс тріскат
А звїзды ся ярят
И през окна оген блискат
Де вечерю варят.
А дітиска коло пєца
Чекают вечери...
„Хвала Богу“ гварит мама
„уж кыпят компери“.

ЛЕМКОВСКИ ПРИПОВІДКИ.

1. Легко воду сколомутити, але долго треба ждати, покалься не счытит.
2. Єден грїх цілу душу спаскудит.
3. Не плюй выше носа, бо себе оплюєш.
4. Пред Богом боґаство великий грїх — а пред людьми бідность.
5. Молись, надійся, але роб и ближе берега тримайся.
6. Муж голова, а жена душа.
7. Муж и жена, то вода и мука — дастся змшати, а розмішати — пропало.
8. З добром женом біда на половину, а радость дубельтова.
9. Зла жена зведе мужа з розума.
10. Як гус без воды, так хлоп без жены.
11. Жена не гуслі, як поґраш, то на клинок не завісиш.

Складайте Ваши ошадности В КОМУНАЛЬНОЙ Касі Ошадности в Крыниці.

Она дає полну гваранцію,
платит добрый процент —
и выплачат зараз выпо-
віджены грошы.

Уділят она также
пожычок на невысокий процент.

Люде, котры приїзджают
на курацію до КРЫНИЦІ

найдут доброго лікаря

Дра МИХАЛА САВЧАКА

вилля Дністрянека
коло костела.

КРЫНИЧАНЕ!

Купуйте товары в КООПЕРАТИВІ

„ПРОГРЕС“

в дому Фатулы

под стацийом желізнодорожном.